



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Conciliorvm Omnivm Generalivm Et Provincialivm Collectio Regia**

Ab anno DCCCCX. ad annum MLXXIII.

**Parisiis, 1644**

Epistola IV. Leonis Papae IX. Ad Petrvm Et Ioannem Episcopos. Eiusdem argumenti. Addit praeterea nonnulla de episcoporum & archiepiscoporum institutione.

**urn:nbn:de:hbz:466:1-15625**

## EPISTOLA IV.

## LEONIS PAPÆ IX.

AD PETRUM ET IOANNEM EPISCOPOS.

Eiusdem argumenti. Addit præterea nonnulla de episcoporum & archiepiscoporum institutione.

*Leo episcopus seruus seruorum Dei dilectissimis in Christo fratribus  
Petro & Ioanni episcopis salutem & apostolicam  
benedictionem.*

**D**ECVS ecclesiarum Africanarum ita conculcatum a Gentibus nimium dolemus, vt modo vix quinque inueniantur episcopi, vbi olim ducenti quinque solebant per Concilia plenaria computari: & ibi pauculas oues, quotidianæ occisioni deputatas, remansisse, vbi quondam innumerabilis grex Domini sub numerosis arietibus exultabat alta pace. Sed hæc peccatis nostris imputantes, iustitiam creatoris collaudantes timeamus, & misericordiam eius instanter postulemus, vt seruos suos tandem respicere dignetur. Quod autem scripsistis nobis pro sanctæ Romanæ ecclesiæ statu, nostraque incolumitate, vos Dominum gratias agendo exorasse, noueritis nos vestræ fraternitati gratias agere, & pro consolatione vestra semper orare. Et reuera, fratres, hoc acceptabile est Domino nostro Iesu Christo, vt caput omnibus membris prospiciat & inuigilet, membra vero sui capitis salutem sine intermissione quarant & optent. Bene equidem fecistis, quod iussi a nobis Concilium de rebus ecclesiasticis habuistis: quod etiam omni anno vel semel agere debetis. Insuper recte contra Gummitanum episcopum, dignitatem Carthaginensis ecclesiæ defendistis: quia sine dubio post Romanum pontificem primus archiepiscopus, & totius Africæ maximus metropolitanus est Carthaginensis episcopus, nec pro aliquo episcopo in tota Africa potest perdere priuilegium semel susceptum a sancta Romana & apostolica sede: sed obtinebit illud vsque in finem sæculi, & donec in ea inuocabitur nomen Domini nostri Iesu Christi, siue deserta iaceat Carthago, siue resurgat gloriosa aliquando. Hoc ex Concilio beati martyris Cypriani,

*Concil. Tom. 25.*

Mmm

Carthagi-  
nensis epi-  
scopus so-  
lus in Afri-  
ca pallium  
habet.  
Concilium  
Carthagi-  
nense III.

hoc ex Synodis Aurelii, hoc ex omnibus Africanis Con-  
ciliis, hoc (quod maius est) ex venerabilium prædecef-  
forum nostrorum Romanorum præfulum decretis aper-  
te monstratur: nec quicumque ille sit Gummitanus epi-  
scopus, aliquam licentiam consecrandi episcopos, vel de-  
ponendi, seu prouinciale Concilium conuocandi habet  
sine consensu Carthagenensis archiepiscopi, cuiuslibet di-  
gnitatis aut potestatis sit: tantummodo procurabit ille  
Gummitanus episcopus, quæ ad propriam parochiam  
pertinent. Cetera autem, sicut & alii episcopi Africani,  
consilio Carthagenensis archiepiscopi aget, qui solus in  
Africa pallium ab apostolica sede habere solet. Vnde &  
episcopos consecrandi principale & antiquum ius retinet,  
sicut ex verbis Aurelii in Concilio Carthagenensi, capi-  
tulo trigessimono potest intelligi, cum dicit: In eccle-  
sia, ad quam dignata est vestra sanctitas conuenire, crebro  
ac pene per diem dominicam episcopos ordinandos ha-  
bemus, &c. Sed hoc vos non lateat, non debere præter  
\* scientiam Romani pontificis vniuersale Concilium cele-  
brari, aut episcopos damnari, vel deponi: quia etsi licet  
vobis aliquos episcopos examinare, diffinitiuam tamen  
sententiam absque consultu Romani pontificis; vt dictum  
est, non licet dare: quod in sanctis Canonibus statutum,  
si quaritis, potestis inuenire, scilicet quia omnium eccle-  
siarum maiores & difficiliores causæ, per sanctam & prin-  
cipalem beati Petri sedem, a successoribus eius diffinien-  
dæ sunt, vtpote cui diuinitus dicitur: *Confirma fratres tuos.*

Luc. 22.

Matth. 16.

& *Tibi dabo claves regni cælorum, &c.*

Sacerdo-  
tum ordo  
bipartitus.

Nunc quia de archiepiscopis & metropolitanis senten-  
tiam nostram requiritis, venerabilium antecessorum no-  
strorum dicta aperte demonstrant, id est Clementis, Ana-  
cleti, Aniceti, & aliorum, vbi ita legitur: Sacerdotum  
ordo bipartitus est, nec amplius quam duos ordines, id est  
episcoporum & presbyterorum, nobis collati sunt, nec  
apostoli docuerunt. Episcoporum autem ordo vnus est,  
quamuis alii præferantur aliis, siue pro eo quod primas  
ciuitates, & magis nominatas, secundum potentiam, aut  
leges sæculi retinent, siue quod a sanctis patribus pro ali-  
qua reuerentia sanctitatis aliquod priuilegium dignitatis  
possident. Nam sicut omnis mundana potestas his gradi-

bus dignitatum a se inuicem distat, id est vt primus sit Augustus vel imperator, deinde Cæsares, deinde reges, duces, & comites atque tribuni: ita & ecclesiastica dignitas ordinata a sanctis patribus inuenitur, dicente beato Clemente: In his ciuitatibus, in quibus olim apud eth-

nicos primi flamines eorum, atque primi legis doctores erant, primates vel patriarchæ positi sunt, qui reliquorum iudicia & maiora negotia iuste diffinirent, qui etiam non vni prouinciæ sed pluribus præessent. Deinde vbi archiflamines erant paganorum, archiepiscopi instituti sunt Christianorum, qui singulis prouinciis præessent. Vbi vero metropolis erat, quæ interpretatur mater ciuitas, metropolitani erant: quippe qui de tribus aut quatuor ciuitatibus intra aliquam prouinciam maiori & matri aliarum ciuitatum præsidebant. Isti aliquando metropolitani tantum nominantur, aliquando vero archiepiscopi, si in ipsa prouincia maiores non fuerint aliqui. Vbi autem minores ciuitates habuerint solummodo flamines vel comites, episcopi sunt instituti. Porro tribuni plebis non absurde intelliguntur presbyteri, siue reliqui inferioris ordinis clerici. His omnibus diuino & humano priuilegio prælatus est pontifex Romanus. Sed de Africæ primatibus aliter intelligendum est, quia in singulis eius prouinciis antiquitus primates instituebantur, non secundum potentiam alicuius ciuitatis, sed secundum tempus suæ ordinationis: quibus tamen omnibus præerat vnus, scilicet Carthaginensis archiepiscopus, qui etiam non incongrue dici potest metropolitanus propter Carthaginem metropolim totius Africæ, quorum supra meminimus. Ita legitur in Concilio Carthaginensi, capitulo vigesimo sexto: Primæ sedis episcopus non appelletur princeps sacerdotum, aut summus sacerdos, aut aliquid huiusmodi, sed tantum primæ sedis episcopus. Sanctam vestram fraternitatem iugiter inuigilantem vtilitatibus sanctæ Dei ecclesiæ, atque deuote pro nobis orantem, sancta & indiuidua Trinitas semper conseruet, carissimi fratres.

Epist. 1.  
tom. 1.  
pag. 94.

Concilium  
Carthagi-  
nense 1.